

Құрметті Сергей Александрович, Құрметті депутаттар!

Өткен жылдың сәуір айындағы Үкімет сағатының қорытындылары бойынша статистика органдарының қызметін жетілдіру жөнінде ұсыныстар бергеніміз естеріңізде болар. Жаңа ғана Агенттік Төрағасы олардың көпшілігінің орындалғанын өз баяндамасында атап өтті. Бұл, әрине, қуантарлық жағдай.

Бүгінгі таңда Агенттіктің қызметі мемлекеттік статистика саласындағы уәкілетті орган ретінде еліміздің дамуының стратегиялық мақсаттарына қол жеткізуге, бағдарламалық құжаттарды және Президенттің Қазақстан халқына жыл сайынғы жолдауларын ақпараттық-статистикалық тұрғыдан қамтамасыз етуге жәрдем көрсетуге бағытталып отырғанын атап өткен жөн.

Қазіргі уақытта Агенттік ТМД елдерінің арасында алғашқылардың бірі болып **«е-Статистика»** жобасын іске асыруды бастап, статистикалық ақпаратты жинау, өңдеу және тарату процестерін толық автоматтандыруға бағытталған интеграцияланған ақпараттық жүйелерді құру мен енгізу бойынша едәуір жұмыс атқарды. Аталған жобаны тиянақты түрде іске асыру, ең алдымен, барлық

қолданушыларға статистикалық деректерге қол жеткізудің қолайлы болуын қамтамасыз етеді. Сондықтан осы бағыттағы жұмысты жалғастыру қажет деп есептейміз.

Қазіргі заманда жақсы статистикалық құралдарсыз және әдіснамасыз сапалы әрі дәйекті деректер алу мүмкін емес.

Мемлекеттік статистика саласындағы әдіснаманы жетілдіру мақсатында Агенттік Дүниежүзілік Банкпен бірлесе отырып, Қазақстанның ұлттық статистикалық жүйесін нығайтудың 2012-2016 жылдарға арналған жобасы шеңберінде халықаралық тәжірибені жинақтау мүмкіндігін барынша пайдалануы қажет деп есептейміз.

Бүгінгі күнгі негізгі мақсат – халықаралық стандарттарды ұлттық статистикалық іс жүргізуге уақытылы әрі толық енгізу. Ал осы стандарттарды енгізу жұмыстарын жүзеге асыру кезінде халықаралық сарапшылармен қатар статистиканың түрлі салаларындағы отандық сарапшыларды да тарту қажет.

Сонымен бірге, Агенттік мемлекет пен қоғамды қажетті ақпаратпен қамтамасыз ету үшін ведомстволардың статистикалық көрсеткіштерін бір жүйеге түсіруді көздейтін Мемлекеттік жоспарлау жүйесінің мемлекеттік статистикамен үйлестіруін қамтамасыз ету жөніндегі жол картасын дер кезінде әзірлеген деп есептейміз.

Бұл орайда, Агенттік Экономика және бюджеттік жоспарлау министрлігімен бірлесе отырып, осы жұмысты соңына дейін жеткізуге тиіс.

2012 жылғы 10 шілдеде Ел Басының **«Қазақстанның әлеуметтік жаңғыртылуы: Жалпыға Ортақ Еңбек Қоғамына қарай 20 қадам»** атты баяндамасында Агенттікке Еңбек және халықты әлеуметтік қорғау, Экономика және сауда, Ауыл шаруашылығы министрліктерімен бірлесіп өзін-өзі еңбекпен қамтығандар тобындағы еңбекке қабілетті халықты жұмыспен қамтуға қарай ойыстырудың әдістемесін әзірлеу және жұмыссыздық деңгейін айқындау әдістемесін жетілдіру жөнінде тапсырма берді.

Біздегі деректер бойынша, Агенттік Халықаралық еңбек ұйымының стандарттары мен ұсыныстары негізінде әдіснаманы әзірлеп те қойған, бірақ сапалы деректер алу үшін Агенттіктің зерттелетін үй шаруашылығы санын тиісті түрде қаржыландыруды ұлғайта отырып, оны 5 пайызға дейін арттыру жөніндегі жұмысын қолдау қажет деп есептейміз. Мұның өзі жұмыспен қамту және жұмыссыздық жөніндегі деректерді аудандар және қалалар бойынша тоқсан сайын жедел түрде алып отыруға мүмкіндік береді. Өкінішке орай, бүгінгі таңда бұл көрсеткіш небары 0,5 пайызды құрайды.

Сонымен қатар, жергілікті жердегі шаруашылық кітабын толтыруға жұмсалатын еңбек шығынын қысқарту мақсатында, сондай-ақ пайдаланушылар мен барлық деңгейдегі әкімдердің қажетті ақпаратты жедел қалыптастыруы және алуы үшін кент, село, ауылдық округ деңгейінде электрондық форматта шаруашылық есепке алуды енгізу жөніндегі жұмысты жеделдету қажет.

Сондай-ақ әлеуметтік-демографиялық көрсеткіштер бойынша сапалы әкімшілік деректер ұсыну жұмысын күшейту қажет, мұның өзі соған жұмсалатын шығындарды есептеу үшін тиімді құрал болар еді.

Соңғы жылдары ішкі туризмнің экономикалық тұрғыдан маңызды екендігі біздің ұғымымызға дендеп ене бастады. Сондықтан Агенттіктің ішкі туризмді дамыту үшін өздігінен ұйымдастырылатын туризмді бағалау әдістемесін енгізе отырып, туризм статистикасы бойынша әдістемелік нұсқаулықтар әзірлеуі қажет деп есептейміз.

Түптеп келгенде, еліміздің экономиканы дамытудың «жасыл» жолына түсуі үшін «болашақтың энергиясын» жасауда ғылым мен инновациялық технологиялардың жетістіктері қуатты серпін беретінін айта кеткен жөн.

Осы мәселені шешу жолында Агенттік «жасыл экономиканы» енгізу туралы статистикалық ақпарат алу үшін инновацияларды, энергия мен ресурстардың үнемделуін, энергияның жаңартылған көздерін енгізуді бағалау әдістемесін әзірлеу жөніндегі кешенді іс-шараларды қарастыруы қажет.

Құрметті депутаттар, алға қойған міндеттерді шешу үшін Агенттіктің барлық мүмкіндіктері бар, олардың алдағы жұмысына табыс тілейміз.

Назарларыңызға рахмет!